

Communicaziun allas medias

Cuera/Glion, ils 17 da december 2020

Concurrenza da projects svilup areal dalla staziun a Glion

Project «Binari 1» per la staziun a Glion

Ensemen cun la vischnaunca Ilanz/Glion ha la Viafier retica (VR) menau atras ina concurrenza da projects per la formaziun futura digl areal dalla staziun da Glion. Ils teams d'architectura envidai havevan l'incumbensa da projectar ina surbaghegiada urbanistica dalla staziun che secunvegna cun il maletg dil liug, riguarda l'utilisaziun, il traffic e la funcziunalitad a moda perschuadenta e persistente e cumpeglia la formaziun digl entir spazi public vischinont. La projectaziun dalla staziun d'auto da posta duei rinforzar la funcziun impurtanta sco center dil traffic public. Ulteriuramein valeva ei da formar in niev plaz public e da pedunzs. Dallas sis contribuziuns alla concurrenza ha il project «Binari 1» da Giubbini Architekten da Cuera gudignau unanimamein.

La projectaziun dalla nova surbaghegiada dalla staziun cunteneva il perimeter dil baghetg dalla staziun existent cun il kiosc sco era il plaz posta existent. Da presentar eran las colli-giazions cun ils intschess cunfinonts, il «plaz posta futur», la «Via dalla staziun» e «Pendas». Medemamein dueva in connex cun la vischinonza surbaghegiada – cun il Center Marcau e la cas'aulta digl Eden – esser veseivels. La VR ha en emprema lingia drizzau l'attenziun dalla concurrenza sin il baghetg dalla staziun, sia utilisaziun ed il contuorn direct. Ensemen cun la vischnaunca han ins era risguardau specialmein igl ulteriur contuorn, la nova formaziun dil plaz posta tenor ils basegns da persunas cun impediments e la bun'encarnadira cun il traffic plaun e public sco era las bunas relaziuns da spazis exteriurs e da spazis libers attractivs. La giuria lauda la gronda seriusadad, cun la quala il pensum ordvart complex ei vegnius prius a maun e la premura generala, cun la quala ils projects ein vegni elaborai. La giuria ha era accentuau en siu rapport la vasta e nunspitgada variaziun dils projects inoltra.

«Binari 1» ha fatg la cuorsa

Il project victur ha saviu perschuer unanimamein la giuria. Il team dalla concurrenza ha elegiu ina structura differenziada dalla construcziun nova. Il cubus ch'ei lev spustaus e gradaus ell'altezia pren si ina relaziun tier la cas'aulta digl Eden, tier il Center Marcau e surpren la funcziun da dar in ligiom alla nova e consistent'unitad al plaz dalla staziun. La tschentada dils dus cubus caschuna dus areals: il plaz dalla staziun, ch'ei en cumparegliazion pigns denton proporziunaus bein, ed il plaz liug per ils autos da posta che vegn circumdaus da plontas. Sin il plaz dalla staziun duei plinavon vegnir installau ina fontauna. Ulteriuramein ha

«Binari 1» persuadiu la giuria cun l'efficienza dil spazi, ils cuosts da construcziun, la rentabilitad ed il potenzial da rendita.

Presentaziun dalla concorrenza da projects

Il 17 da december 2020 vegnan ils resultats ed il project victur presentai virtualmein en emprema lingia ad instanzas dalla vischnaunca e dalla regiun selecziunadas, denton era als participonts dalla concorrenza sco era als proprietaris da terren vischinont ed als habitonts interessai dil quartier. Ulteriuramein vegnan las medias e silsunter la publicitad informadas. Oriundamein era ei previu da mussar allas habitontas ed als habitonts ils projects dalla concorrenza ed il project victur a caschun dad in'exposiziun publica. Cunquei che la situaziun da COVID-19 s'accentuescha puspei ston ins desister dad ina tala. La populaziun obtegn per s'enter la pussivladad da mirar ina presentaziun virtuala dils resultats entras la presidenta dalla giuria, Janine Vogelsang, naven dils 18 da december 2020 sin la pagina d'internet dalla vischnaunca Ilanz/Glion (www.ilanz-glion.ch) e dalla VR (www.rhb.ch/immobilien).

Occurrenz d'informaziun igl onn niev

La populaziun dad Ilanz/Glion duei vegnir informada detagliadamein davart il project. Medemamein survegn ella la caschun da discuorer cun ils directamein pertucchai davart il project e la revisiun parziala dalla planisaziun locala ch'ei necessaria per la realisaziun. Il schaner 2021 vegnan occurrenz d'informaziun pertuccont il svilup planisau digl areal dalla staziun organisadas, muort corona a moda digitala. Sco termin per l'emprema occurrenza ei ils 20 da schaner 2021 vegnius definitius. Ils detagls vegnan publicai l'auter onn egl Fegl official Survelva.

Ulteriur proceder

Il project victur fuorma la basa per ils proxims pass da planisaziun. Quel duei vegnir perfeziunaus ed elaboraus tier in project da baghegiar. Il medem mument vegn la vischnaunca Ilanz/Glion ad adattar il plan da quartier existent «staziun» sebasond sin il project victur. La planisaziun locala el territori dalla staziun vegn medemamein actualisada cun risguardar il project victur. La revisiun parziala dalla planisaziun locala vegn suttamessa alla cuminonza da votants all'urna igl emprum mezz onn 2021.

Per informaziuns stattan a disposiziun:

Viafier retica: Silvio Briccola, menader finanzas, tel. +41 81 288 63 06

Vischnaunca Ilanz/Glion: dr. Carmelia Maissen, presidenta communal, tel. +41 81 920 15 15